

**NAQQIUT****Naalakkersuisut 28. septembarimi akissutitut allakkiaannik taarsiisoq  
(allannguutissatut siunnersuut akuersissutigineqarnissaanut innersuussutaavoq)**

**Nunavummi Nunavimmilu oqartussaasut suleqatiginerisigut inuusuttunut 16-it 30-illu akornanni ukiullinnut "Nuna Job paarlaateqatigiinneq"-mik pilersitsinissaq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Jane Petersen aamma Juliane Henningsen, Inuit Ataqtigiit)

**Saqqummiussassaq**

(Inuussutissarsiornermut Aatsitassanullu Naalakkersuisoq)

**2. Aappassaaneerpeqarnera**

Siunnersuuteqartut Inatsisartut 2011-mi upernaakkut ataatsimiinneranni siunnersuuteqarput, inuusuttut issittormioqatitsinnut Nunavummut Nunavimmullu paarlaasseqatigiinnikkut suliaartorsinnaasarnissaannik siunertaqartumik. Oqaluuserisassat siullermeerpeqarnerani Naalakkersuisut siunnersuutigivaat, Nuna Job-imik taallugu aaqquissuussisoqartalersinnaanissaa siunertaralugu isumaliuutissiisummik Inatsisartut siunnersuut pillugu aalajangiussinnginnerani saqqummiusserusullutik. Tamatumunnga Inatsisartut isumaqataallutik qisuariaateqarput.

Massakkut nalunaarusiaq naamassineqarsimalerpoq. Inuussutissarsiornermut Suliffeqarnermullu Pisortaqarfiup – naatsumik oqaatsigalugu – Nuna Job-pillugu periarfissat assigiinngitsut pillugit misissuisimavoq. Tamatumani aamma sukumiisumik aningaasatigut nassatarisinnaasai qulaajaavigisimallugit. Assersuutigalugu angalanissamut aningaasartuutaasinnaasut, allaffissornermut aningaasartuutaasinnaasut, Nunani Avannarlerni Ministerråd-imik suleqatiginnissinnaaneq, inisimaffeqartarsinnaanermut tunngasut, suliffeqarsinnaanermut tunngasut misissuiffigisimapput. Tamatuma saniatigut pisortaqarfiup nunatta issittumilu nunat allat akornanni attaveqatigiinnermut pissutsit atuuttut/siunissamullu takorluukkat qiviallaassimavai.

Siulliullugit kingulliutillugit taaneqartut eqqaassagaani, taava nunarput kulturikkut ilinniartitaanikkullu issittormioqatitsinnik attaveqaateqarfeqarpoq.

Ilinniartitaanermut Ilisimatusarnermullu Pisortaqarfiup ilisimatitsissutigivaa, massakkorpiaq Nunavummik suleqateqalernissamut ilusilersuineq suliarineqaleruttortoq. Ukiuni 2011-p 2013-llu akornanni naatsorsuutigineqarpoq tamanna siunertaralugu ataatsimeeqqattaarnerit ingerlanneqarumaartut. Tamatuma saniatigut Canadamik isumaqatigiissuteqartoqarnikuuvoq, nunatsinnit ilinniariartortut canadameersutulli pisinnaatitaaffeqartut aamma atuarnermut akiliutissaq eqqarsaatigalugu. Tamanna nunanit allaneersunut allanut sanilliullugu annertuumik sipaaruteqarfiusarpoq. Tamatuma saniatigut Aatsitassanut Ilinniarfik inuusuttunut ilinniarnissamut sanarfisaqaleruttortoq. Tamatumani ilinniarnermi toqqammavusut atuagarsornermut misilittaaneermullu tunngatillugit oqimaaqqatigiissineqarsimallutik. Kingulliullugu taaneqartumut erseqqissaatigineqarsinnaavoq, sungiusaatigalugu sulinissamut periarfissat ujartuiffigineqartariaqassasut, tassami tamatumuuna periarfissat tamaasa uagut nunatsinni nammineerluta suli naamassinniffigisinniffigisinnaannginnatsigit. Taamaattumik

Aatsitassanut Ilinniarfiup Nunavut-mut saaffiginnissuteqarsimavoq, siunissami suleqatigiittoqalersinnaanera siunertaralugu. Tamatuma saniatigut Nunavummi højskolimik pilersitsisoqarsimavoq, nunatsinni højskoleqarnermut assingusumik toqqammavilerneqarsimasumik. Tassunga tunngatillugu neriorsuisimapput nunatsinneersunik marlunnik inissaqartitsisarniarlutik. Akerlianik Knud Rasmussenip Højskoliata Sisimiuniittup Nunavumeersunik aamma marlunnik inissaqartitsisarnissani neriorsuutigisimavaa.

Nalunaarusiami ilanngunneqarsimapput aaqqissuussisoqassappat aningaasartuutaalerumaartussat pillugit paasissutissat, qanoq iliornikkut Nuna Job-imik aaqqissuussisalernissaq pitsaanerpaamik aaqqiivigineqarsinnaanersoq. Nalunaarusiami ilanngullugit qulaajarneqarsimapput, Inatsisartut ilumut kissaatigippassuk Nuna Job-i pillugu aaqqissuussisoqartariaqartoq, tamanna pitinnagu qulaajagassat arlallit qulaajaqqaarneqartariaqartut. Assersuutigalugu paasiniarneqqaartariaqartoq nunatsinni inuusuttut akornanni Nuna Job-imik aaqqissuussisoqarsinnaanera pillugu qanoq annertutigisumik soqutiginnittoqarnersoq. Tamatuma saniatigut Nunavummi Nunavimmilu assigiinngitsutigut attaveqarfigineqartartussanik nassaaqqaartoqartariaqartoq. Aammattaaq Nunani Avannarlerni Ministerrådi Nuna Job-i pilersinneqassagaluarpat arlaatigut aaqqissuussinerup aqunneqarnissaa pillugu suleqatigiittoqarsinnaanera, taamatullu Nunat Avannarliit Ministerrådiata aningaasaateqarfii eqqarsaatigalugit tapiissuteqartoqarsinnaanera paasiniaaffigineqartariaqartoq kissaatigineqarluni.

Nalunaarusiami Nuna Job-i pilersinneqassagaluarpat naatsorsuusiorsimanerit arlallit missingersuussiorfigineqarsimapput. Takorlooraani inuit tallimat aallartinneqarnissaat aallaavigineqassasoq, tamatumunnga aningaasartuutaalerumaartussat 600.000 kr.-usussatut tagginneqarsimapput. Tamatumani ilanngunneqarsimapput inunnut pineqartunut toqqaanartumik ingerlatsinermullu aningaasartuutaajumaartussat.

Naalakkersuisut iluarisimaarpaat issittumi naggueqatitta nunattalu akornanni suliniutit arlallit aallartisarniarneqalersimammata. Tamanna – pinngitsuunnngivissumik – kulturikkut paarlaatseqatigiittarnerit eqqarsaatigalugit malunnaateqarluartumik annertusaanerusussaajumaarpoq, tassuunatigullu aqutissiuunekarumaarluni issittumi innuttaasut akornanni ilisareqatigiinnerulernissaq aqutissiuunekarumaarpoq. Taamatulli iliuitsit Naalakkersuit tamakkiisumik tapersersugarivaat.

Siunnersuuteqartut siunertarisaat naaperiarumallugit Naalakkersuisut siunnersuutigissavaat, siunnersuummi taaneqartutut siunertarineqartut toqqammavigalugit suliaq ingerlateqqinniaratsigu – tassalu Naalakkersuisut innersuussutigineqartut tunngavigalugit suleriaqqinniarata, tassuunatigullu qulaajagassat assigiinngitsut isumagissallugit. Tamatumani ilaatigut pineqarput, paasiniassallugu ilumut qanoq annertutigisumik nunatsinni inuusuttut Nuna Job-imik aaqqissuussisoqarnissaanik soqutiginnitsiginersut. Attaveqaataasinnaasut nassaariniassallugit taavalu aamma kikkut aaqqissuussinissamut aningaasalersueqataarusinnaassanersut paasiniassallugu. Taamatut qulaajaanissat sapinngisamik piaarnerpaamik aallartinniarnekarumaarput. Tikkuussiffigineqartut tamakku nalunaarusiami atuarneqarsinnaapput.

Inuussutissarsiornermut Ataatsimiititaliaq isumaliutissiissummini siunnersuummut matumunnga allannguutissamik siunnersuuteqarpoq, tassani Ataatsimiititaliap Naalakkersuisut inassuteqaataannut nangissutigitillugu siunnersuutigaa, Naalakkersuisut UKA 2012 tikitsinnagu Nuna Job-imut aaqqissuussamik pilersitsinerimut atatillugu ilassutaasumik nassuiaammik Inatsisartunut saqqummiussissasut.

8. nov. 2011

UPA2011/39  
UKA2011/20

Naalakkersuisut Inuussutissarsiornermut Ataatsimiititaliap allannguutissatut siunnersuut taperserpaat aammalu siunnersuutip akuerineqarnissaa inassutigalugu.